



AV TRESCHRETIEN ROY
DE FRANCE ET DE POLONGNE
ANDRE THEVET SON COSMOGRAPHE
ET TRESHVMBLE SVBIET,

Heur & Felicité.



OMBIEN que les troubles (SIRE) qu'aucez trouuez en Frâce à vostre retour de Polongne, m'ayent donné au cōmencement quelque crainte, d'empescher vostre Maesté de la lecture d'vne Cosmographie par moy mise en lumiere: si est-ce que la debonaireté & clemēce qu'on voit reluire en vous m'a asseuré, qu'il n'y a empeschemēt qui vous destourne des hōnestes exercices, auxquels vostre naturel s'adōne quād l'occasion se presente: & que par ce moyen ce mien œuure pourroit estre de la partie, pour raison de ce qu'il contient. Car en premier lieu (SIRE) ie descrits l'ordre des cieux, les corps celestes fixes & mobiles, c'est à sçauoir les planettes, signes, & autres estoiles, du firmament: Les quatre elemēs desquels tout cest vniuers est cōposé, ensemble leurs essences, qualitez & transmutations. Puis traictant de la terre, ie pene- tre iusques à ses entrailles, & descrits la situation des lieux, les longitu- des, latitudes, meurs & façons de viure des peuples habitans d'icelle: poursuiuant si amplemēt l'ordre Cosmographique, qu'il n'y a pais, pro- uince, mer, coste, plage, promontoire, goulfe, haure, riuiere, montagne, ou isle, qui ne soit par moy diligemment descrite, & espluchee par le menu, avec la diuersité de toutes sortes d'animaux, & plâtes estranges, que produit chacune contree: & mesmes les terres incogneues des an- ciens & modernes, lesquelles les plus sçauans disoient estre inhabitees, à cause que de leurs temps nul ne s'estoit hazardé de passer outre no- stre Tropicque. Dequoy tous Princes peuuent tirer vn merueilleux cō- tentement, sur tout lors qu'ils ont quelques entreprinſes à executer. Hannon, capitaine Carthaginois tant celebré des histoires, n'eust en- trepris le voyage d'Ethiopie, ne icelle illustree sans les prieres de ses citoyens. Ces grans personnages Nearco & Onesichrite ne fussent passez és Indes, ne icelles visitees, sans l'aide & confort d'Alexandre le